

四庫全書

集部

欽定四庫全書

集部
西卷集卷二

詳校官庶吉士臣龍廷槐

中書臣劉源溥覆勘

總校官庶吉士臣何思鈞

校對官中書臣王鍾泰

謄錄監生臣蕭椅年

欽定四庫全書

集部六

西菴集

別集類五 明

提要

臣等謹案西菴集九卷明孫賁撰賁字仲衍廣東順德人洪武三年舉於鄉旋登進士授工部織染局使遷虹縣主簿召入為翰林院典籍出為平原主簿坐累逮繫旋釋之起為蘇州經歷復坐累戍遼東既而以嘗為藍玉

題畫坐玉黨論死是編前有黃佐葉春及所
撰黃小傳稱黃著述甚富自茲集外尚有通鑑
前編綱目孝經集善理學訓蒙和陶詩集古
律詩其孝經集善則宋濂為之序黃致諸書
散佚其詩文今行世者為其門人黎貞所編
然佐稱西菴集八卷而是編詩八卷文一卷
卷端題姑蘇葉初春選或初春另加釐訂歟
黃當元季綺靡之餘其詩獨卓然有古格雖

神骨雋異不及高啟而要非林鴻諸人所及
小說載書生見蘇軾侍姬朝雲之魂有集句
七言律詩十首七言絕句十五首今乃在此
集第八卷末蓋黃游戲之筆即黃佐傳中所
稱集古律詩一卷者是也黎貞乃綴於集末
又併其序載之遂似黃真有過鬼事者殆與
林鴻集末附載張紅橋詩同一無識矣乾隆
四十四年正月恭校上

欽定四庫全書

禮部

總纂官臣紀昀臣陸錫熊臣孫士毅

總校官臣陸費墀

欽定四庫全書

西菴集卷一

明 孫賁 撰

五言古

雜詩六首

飄風振長薄夕日澹無輝
良人久楚蜀今在沅水西
別時春花發秋葉忽已飛
無由通精神夢寐長相隨
欲寄一尺書臨風久徘徊
游鱗沒水曲征鴈杳雲涯
哀猿常

對吟凍鳥亦並棲居然獨處廓坐使恩愛違何能一會
晤以慰悽惻懷

浮萍無根蒂泛泛江海間狂風簸巨浪漂泊何當還亦
似離家客長年去鄉關莽莽涉萬里迢迢度千山沈憂
損精魂遠道多苦顏無為歌此詞惻愴傷肺肝

大堤有游女盛服佩鳴璫冶容麗皎日錦綺華若英含
情采秋綠薄暮不盈筐問女何所思疊疊哀怨長夫君
久離索杳邈江與湘寒涼入短褐波浪汎舟航芙蓉謝

初夕巖桂亦已芳渺渺燕北歸飛飛鴈南翔風飄流塵
起木落天雨霜俯視慚遊魚仰觀愧七襄此情君詎察
懷玉空自傷

燦燦園中樹灼灼枝上花朝迎雲間日暮逐東逝波秦
樓起荒煙鄭谷棲餘霞浮雲等霧露富貴焉足多

邊城亘長雲迢迢接沙漠時平宣威遠壯士從軍樂霜
風朝出獵錦旆明揮霍營田懸兩狼都護挂雙貉前矛
擁宛騎後勁吹羌角官勳四時轉征戰邊塵邈腐儒身

計疎中夜思奮躍何能投章甫從爾上麟閣

十月良家子從征上邊州明月照鏡匣北風吹馬頭少年有奇志思欲分國憂誰能學李廣百戰不封侯

南園

詩社良讌集南園清夜遊條風振絡組華月照鳴騶高軒敞茂樹飛甍落遠洲移筵對白水列燭散林鳩雅興殊未央旨酒詠思柔玉華星光燦錦綵雲氣浮麗景不可虛衆賓起相酬長吟間劇飲楚舞雜齊謳陵陽杳仙

駕韓衆非我儔聊為徇時序娛樂忘百憂

南園夏日飲酬王趙二公子澄佐

郡城多暇日公子專幽尋招攜無俗士歡宴盡華簪臨
水釣遊魚凌風弋高禽南園當盛夏灝氣滌煩襟澍雨
朝浥道流雲豁輕陰芙蓉被曲渚灌木秀高林展席羅
長筵美酒對坐斟交交黃鳥弄聒聒玄蜩吟歲時速遷
翰賢聖皆銷沈於時不痛飲負此芳賞心

溪山小隱

日出景更好流青入窓戶木落葉上霜泉添夜來雨策
驅過石橋傍舟向沙渚遇此休禎期何須羨簪組

道上作

高林翳當道莽莽秋向深回風亂落木驕陽亦化霖我
行泥塗中淒厲入我襟白日晦平陸玄雲生夕陰歸鳥
靜不飛暝猿長哀吟感此時景邁況將陽月臨不怨行
路難所嗟歲駸尋悲鳴激楚奏思苦調南音鍾儀久已
死誰復知此心

期羅浮蕭鍊師不至

石室松桂秋涼風
滌殘暑柴門敞空谷
曠夕懷仙侶吹笙
久不至鶴馭今何許
朗月流清輝山中幾
延佇

寄琪琳黃道士

雨絕天景佳前榮樹
光綠遙憐採芝侶
遠在春山曲琴歌
久已斷酒賦何由續
有約今夕同開樽
掃茆屋

崖山有感

崖山峙海門迺宋沈國所
雙龍如九淵義士沒遥浦
妻

子驅先淪焚香亦何補我來弔忠魂但見浪花舞底用
璽發光淒其為懷古

安期昇仙臺

神仙莫可稽欲弔蹤多漫惟有安期生遺臺粵山畔想
當避秦亂南還事冶鍛砂採芙蓉靈火煬電光爛丹成
遂輕舉跨鶴陟雲漢尚留如鳧鳥世上作奇翫飛騰今
何之翹首起吁嘆

夏日過蒲礪寺後二巖觀菖蒲

炎威鬱難攄況值日方永揮筆偕同袍遠詣山中靜消
暑得清泉流來自巖頂循澗見石蒲彌布水光映蜩毛
刺針鉉虎鬚簇錐穎娑濃靛敷翠色香挺挺傳是古
堯韭一覽心已領採餌可明目爍爍電光耿尤堪引壽
齡久視閱遐景遂躡安期蹤雲路恣馳騁旋歸乘天風
浩然塵夢醒

寄琪琳黃道士墨竹

漾漾大湖水娟娟文玉叢龍光起夕霧鳳羽生秋風水

輪出寒峭瘦影篩玲瓏因之懷所思邈在蓬萊宮

寄關大舉隱士

秋陽化為霖流潦漲平陸陰霾晦萬象歲暮時運速居
者窘營為行者困馳逐晨興起慨歎旅懷傷局促颺風
振叢薄泥塗沒車軸庭樹無全柯原草變餘綠靜念窮
居士杳然蒼山麓短褐纔掩脛糗糒常不足從事屢失
會養高動違俗空櫝隋侯珠誰明卞氏玉貧賤少知己
隱淪愧親族勵節希世賢君子善自勗

西郊秋日

斗柄揭西晨杪秋天氣肅零落沾野草驚飈振林木西
疇農務成勤忙事刈穫歲時樂豐稔膏澤遍種桂思昔
遊京洛寒至未成服敝裘感季子知貧仰鮑叔哀樂如
流電撫已心已足無煩抱龜策更就詹尹卜

南園懷李仲修

幽獨攄雅懷逍遙步南園繁卉耀陽德嘉禾秀春暄時
暘燠土膏流澌漲遠川荃蘭揚朱英山樊炫文軒垂楊

列曲渚鳴鳥何關關展席芳醕陳開觴羣物妍顧瞻失
儔侶高情寄所宣馳思望遠人迺在伊洛孺賢勞事會
計日昃不遑安聊復縱長吟引領希令言何能此會合
宴樂舒我顏

贈從弟 三首

鴻鵠在陂澤立志恒不羣獨鶴唳九臯音響常遠聞令
器逢盛時豈將久湮淪無為秉孤節甘與巢許鄰

青陽播林麓百卉生光妍如何空谷資尚爾霜霰纏守

節抱苦貞豈不幽且寒由來松柏性羞學桃李顏
荆山有良玉韞此璞石中玉人彫琢之始能成珪琮良
玉豈非寶亦在彫琢功願言保令譽黽勉光吾宗

贈留隱士中美

商飈落庭木芳歲倏已週感此流序易惻惻但懷愁念
我同志友不得偕宴遊一居玉堂署一在炎海陬王道
今清平有才贊鴻猷誰令抱孤志坐戀林與丘

北上

京華文物盛東南紫氣浮祥雲開甲第春陽藹道周觀
國方振纓彈冠始鳴騶臯夔預接武多士為我儔如何
舍此去北上賦遠遊揚帆渡淮水驅馬入青州青州非
故鄉鬱鬱久難留西望太行巔南臨清濟流行行日已
遠役役安得休微官宦况薄旅邸芳歲適嚴風被草木
密雪沾衣裘迢迢百越地杳邈炎海陬那能計歸日苦
道阻且脩

別弟

離離原上草歲晚霜霰滋與子為兄弟生世逢亂離飄
蕩各分散生死安得知樂土歎無食南州嘆無衣良時
幸休明天路開清夷翩翩兩鴻鵠振翼思奮飛一留故
山樹一望雲中涯東西各異勢顧影相徘徊遠道去茫
茫會合未有期吞聲念同氣淚落不敢揮他鄉儻言歸
庶慰遙相思

別鄰

諺云骨肉遠不若鄰里親往來旦夕念眷意一何勤願

言永相保不謂遠離分攜壺與挈榼送我衢路津含愁
向往軸酌酒當霜晨戀戀疎者厚依依故情新去去歸
未期留家猶食貧有無通假借此道古所敦無為忘寄
托別語多苦辛

別友

喔喔晨雞唱蕭蕭征鴈鳴行裝戒往僕遊子趣脩程嚴
風裂敝裘霜氣集冠纓亦知歲聿暮奔走詎遑寧盼盼
依衢路煢煢別友生鵲鴝傍我飛楓樹送我行商歌慘

無歡飲酒催盡觥車輪倏已遠賓客如晨星離別固可惜志在身與名相期各黽勉天路方清平

別內

秋霜凋女蘿夕露沾兔絲依依兩夫婦貧賤生別離思昔結縞日適際離亂時布衣纔掩脛糟糠不充饑性拙命復窮偃蹇世所嗤賴子同甘苦孤貞常自持幸逢世道平天路振羽儀歡愛未云竟殷勤方自茲執袂詎忍分清涕流裳衣淹留日月促去去無歸期晨雞咿喔鳴

行李戒路岐僕從已嚴駕寧能更遲遲所嗟長辛苦不
為兒女悲遺語望鄰曲含酸望親知惻惻重惻惻此懷
當告誰

代友贈別

金蘭結深契厚愛兄弟親歡娛暫相違一日勝九春如
何捨我去去逐衢路塵行役冒雪霰驅馳極宵晨寒雀
思集樹凍池念潛鱗物微尚有托君作歲晚人歲晚風
已寒蕭蕭吹車輪征袍敝不補野飯新亦陳別曲亂無

腔別酒醉失巡私情豈遽忍欲止知何因落日如銅鉦
遠山生紫雲君去意惻惻我留涕紛紛王度今清夷世
途無荆榛前期慎努力莫用懷苦辛

代內贈別

惻惻重惻惻君為遠行客遠行無時還千山復萬山不
怨別離苦所嗟道路難鴻鴈集沙渚鳥雀棲山樊遑遑
欲何之竟歲不得安昔為風中柳今若霜後蘭雪霰被
平野風沙侵苦顏苦顏日以凋去路日以遙妾今守空

閨歲暮不自聊寒花無妍姿凍柳無秀條淒其舊容色
坐為憂患銷臨期一樽酒聊以永今朝前途善珍重努
力登雲霄

寄王給事佐

休沐展幽眺步出鍾阜阿卉木春氣盎淮水揚素波泛
泛波上鷗游泳鮮羽儀端坐愧此鳥長遊成蹉跎安得
理歸檝翩然解珮珂揚舲過關右鼓柁入江沱友于事
讌集物候方陽和酌酒南園上與君同笑歌

寄鄭進士毅德宏

步出城東門豁我幽素懷茂樹交綠柯鍾陵敞雲厓有
鳥鳴春樹顧聲何喈喈靜言感物理心思寡所諧生念
同門友襟期曠以乖亨衢未接武丘樊尚高棲王度今
清夷縉紳若雲來鳴珂登鳳闕曳履上鸞臺誰憐抱孤
貞甘分棄草萊朝吟小山篇暮詠猛虎詞會酬盍簪願
天意諒不違

車駕遊天界寺應制

車書渾文軌海嶽獻嘉祥皇風載清穆王度日隆昌開
歲時豐慶九域會冠裳璇文星再紀五色日重光順令
下宸遊招搖隨西行靈雨浥馳道條風清太常萬騎羅
長雲干官沸鳴璫翠華旋地軸黃道闢天閭紺殿開祇
林金蓮燦上方百靈儼扈蹕龍象肅周行于時春始和
淑氣播青陽卿雲籠羽蓋瑞旭炫虹梁多士溢詞林侍
從參翺翔玉音聞磬欵御翰灑琳琅賡歌詳舜訓文思
粲堯章天顏穆以愉清宴樂未央願言敷聖澤仁風被

八荒

朝回呈諸閣老

承恩入翰苑竊祿侍彤帟日月行黃道璣衡耀紫微
菲才忝下列丹衷無由披凌晨陪稷契日晏揖臯夔
海岳方奠安神人亦恬熙斂蓋瞻鸞馭鳴珂集鳳池
遙望雙闕門飛觚切雲霓交疏羅結綺疎柳轉文鸞
輕裾隨風旋綠樹晝景移明良感嘉會文物應昌期
濯濯聯華采翩翩秀羽儀宣情寄芳藻聊用頌清夷

贄翰林宋先生諸老

依依野田雀本在桑榆間
深林蔭棲息卑枝覆羽翰
春風照九垓陽和德澤寬
翱翔霄漢上迺得隨鴛鴦
羣公珪璧才盛世仕明君
出入金門裏百辟同繽紛
顯宦極崇高下顧念斯文
惠然枉禮遇揣已愧明恩
際會信有時感激復何言
斐文謝嘉誨久敬道彌敦

輸役蕭牆

係組赴烏臺解珮辭禁垣
弛刑許輸役獲譴尚承恩
跼

躋感明宥引咎復何言平明操板築日沒就微纏寒氣
襲敝裘重負賴我肩撫已諒無愧服勤思蓋愆息杵入
屏城仰瞻東華門祥風拂左纛卿雲護彤軒翬鳳麗羽
翰飛稜高中天重闢起象魏光彩一何鮮百辟羅周行
鳴珂翕鏘然臯夔儼穆肅董賈來翩翩白日光昭融下
照寧有偏微命嗟薄劣獨茲阻周旋

治縣事作

訟庭敞公館牒訴日紛紜退食常少暇吏牘苦長勤刻

木對胥曹皇華勞遠賓
清晨起坐暑日入未解紳
出沐事宴遊聊用散我神
雲還幽谷曙鳥鳴芳樹
春信美非久居欲留嗟
無因逝言謝簪紱垂綸
越水濱

送王給事南還

良時幸一邁嘉運難再逢
流序若飛電倏忽歲云終
羨子瑚璉器林麓隱高蹤
適此徵俊彥奮起惠家邦
觀光充上賓恩禮赫以隆
金門拜給事百辟肅敬恭
迴翔忽斂翼言歸滄海東
昔若雲中鳳今若南飛鴻
出處各有

道顯晦詎能同微官慚苟祿仰首慕清風文成德亦著
節立道斯崇願言秉夙志永保貞素躬

還山行

禽魚不可友出就斯人居迂才忤盛世復此歸敝廬投
迹近逸民振衣辭高衢白雲遶我屋清澗循我除深林
挽雲軒松竹鬱森疎貧家何所有但有琴與書日暮無
人來濁酒聊自娛神全慮斯澹妙得景亦俱豈不樂守
貞幽抱恒未舒屯膏遠聖訓獨善曠仁譽徘徊望蒿衡

惻惻懷居諸

擬古

行行重行行

岐路一樽酒送君當遠行
交持未及竟絲管激哀聲
冉冉歲華暮悠悠雲氣征
馳車戒往路惻惻傷我情
我情默已傷歡愛不可忘
昔為春花妍今為秋草芳
秋草芳有時夫君見無期
獨宿坐長夜淚落如綆縻
白日儻回照孤懷君所知

青青河畔草

青陽煦林薄春氣匝道周婉孌都人子采桑南陌頭脩
眉婉清揚玉顏和且柔明粧照碧落五馬為久留久留
諒奚為妾非貴者儔貧守逢蘧蔭獻食獨安羞

青青原上栢

置酒高堂上賓友列長筵綺食羅雕盤烹鼈膾熊蹯回
風吹繡縠悲管間清彈遺響妙入雲慷慨有餘懽流光
若逝水安得長駐顏薄酒聊斟酌幽襟良可歎

今日良宴會

南園有佳人窈窕桃李顏容華一何麗顧盼生光妍進
退禮自防秉德幽且閒良媒候嘉意君子希令言鴻鴈
念儔侶睢鳩鳴河間盛年若流水隱處獨長嘆

西北有高樓

華月散高樹列曜何參差流光射結綺思婦慘中闈良
人涉遠道感嘆夜何其清聲發妙曲宛轉有餘哀妙曲
固可聽餘哀知為誰春至桃李妍歲暮華色衰居然獨

處廓顧影久徘徊

涉江采芙蓉

故人隔千里寄我青琅玕
琅玕色美好愛重若丘山
感茲纏綿意將以遺所懽
路遙不能致欲插排風翰

明月皎夜光

離離谷中樹燦燦春華芳
枝葉何盛茂忽然隨風揚
流光有凋換物理安可常
擾擾路旁子哀歌使我傷
杪秋天氣肅白露結嚴霜攬
衣不能寐起視夜何長
明月出

東壁衆星羅縱橫歲暮鷓鴣鳴百草青自黃遠道者誰
子驅車登太行太行鬱嵯峨天路無津梁興言念同志
涕下沾我裳

冉冉孤生竹

青樓何高高綺疏臨道旁美人娛永夜皓齒發清倡玉
顏羞掩媚妙曲婉成章含宮亦泛羽忽復轉徵商行雲
駐遠漢飛塵連虹梁識曲世所稀遺音空飄揚歌竟夜
關寂悠悠哀思長

庭中有奇樹

洞庭木葉下悲吹
激微寒美人倚脩竹
凝睇九疑山層
雲沒遠巘軒車絕
來還既懷文玉佩
復采澧水蘭結言
欲有贈天路遠險
艱沈憂坐將老歲
月銷令顏

迢迢牽牛星

北風吹雪霰同雲
四垂陰惠而能好
我寄我瑤華音
蟋蟀入床下晨風
飛北林川梁限楚
越思子關傷心

回車駕言邁

壯士悲白日達人愛景光
景光無停留鬢髮忽已蒼
嚴霜被野草行旅思故鄉
禽鳥有所識百蟲知潛藏
如何不黽勉老至空自傷

東城高且長

咸陽九原上昔日冠蓋塲
秋風動禾黍曠野浩茫茫
大化無停留榮耀安可常
烟雲迷五柞榛棘沒長楊
時運理則然來者徒自傷
所以放志意酣歌稱我觴
鳴箏縱繁響緩此幽思長
回車長樂坂將去復彷徨
願為雲中

鴈寥廓恣高翔

驅車上東門

良辰集賓友載酒登北邙
百草何離離高墳被山岡
四野生悲風夕日寒無光
狐狸穴空墻樨子覓亡羊
人生寄一世奄逝若朝霜
高堂與大宅終作荊棘場
蓬萊隔弱水仙說成荒唐
及時且行樂勿用徒悲傷

去者日以疎

白日無流光逝水無迴波
浮生類轉燭運盡歸山阿
松

栢夾長路高墳起嵯峨古來皆若此咄咄將柰何誰絃
雍門琴和此薤露歌

生年不滿百

日月遞朔望推遷無時停鼎鼎百年內所為竟何成賢
者解斯理達生外其形良辰有美酒日對賓友傾迢遙
閭風丘竒樹秀瑤英周王八駿没天路杳冥冥

凜凜歲云暮

江潭十月交霜露萃郊原卉木無留榮百草日夜乾鴻

鴈鳴洲渚猿狖悲空山
閨人念遠道撫節涕洟川
梁一睽隔魂夢夜不安
厚愛君詎知新恩忘前
懽忠誠不見白剖心良
獨難望望千里道無由
生羽翰

孟冬寒氣至

愁人起視夜北斗低復
昂中垣耀室壁良月知
載陽客行涉遠道葛屨
履嚴霜願欲同辛苦江
漢愁且長臨風付書札
鴻鴈無來翔悄悄閨闈
心歲暮惟獨傷

客從遠方來

妾有錦繡段文采裁為衾上羅連理枝下織雙飛禽惜
此嫁時物珍之比南金良人隔山海歲月亦已深願因
飛鴻翼寄以表此心

明月何皎皎

歡愛夏日短憂愁春夜長房帷敞虛白對此華月光薄
雲淒以至入我羅衣裳悁悁感心目欲寐還不遑良人
遠行役三載滯遐方別時木葉落今已花卉芳無由達
衷曲悵望隔河梁

天
地
人
物
事
理



書
法
論

十一

西菴集卷一

欽定四庫全書

西菴集卷二

明 孫賁 撰

樂府

將進酒

青瑤案上離鸞琴一徽已直干黃金開樽花下對明月
欲彈一曲還沈吟沈吟沈吟幾低首且彈商聲勸君酒
雍門楓樹春蕭蕭地下田文骨應朽

紫騮馬

紫騮馬黃金羈妾家夫婿金陵兒金陵正值錦華時日
與遊俠相追隨追隨遊俠金陵下長跨金羈紫騮馬
勝初登蹴踘塲縱酒還來鬪雞社越羅楚練照晴空飛
鞚揚鞭去似龍却轉端門回輦路斜穿夾道過行宮行
宮夾道通三市長使旁人誇意氣紫陌春融錦繡連青
樓日暮簫笙起青樓娼女研羅裙清歌宛轉駐流雲歌
闌陌上春風度舞罷樓前壁月新陌上樓前相識多相

陪相引屢經過房櫳寂寞交疏裏雲鬢粧成柰爾何

烏夜啼

龍葱窻閉雲凝影織錦梭停蜀絲冷蘭心欲語還自絨
待郎不來秋夜永秋烏夜夜啼啞啞鳳書應來郎到家
開門自把枇杷花

望行人

高樓臨廣路朝日麗綺疏美人盛容飾凝睇倚踟蹰
踟蹰長太息愁思鬱煩紆愁思知何為自言惜離居將期

歲暮返忽歷三載餘昔如春園花今若秋水蕩盛年詎
可再獨宿誰與娛思逐北風翔相從千里餘中途儻相
失浩嘆何所如

長相思

洞庭清秋灝氣多金盤彩月搖碧波湘靈朱絲奏雲和
九疑木落風娑娑長相思渺何極湘山雲斷湘水深淚
竹年年雨花碧

飲馬長城窟行

長城去迢迢征馬鳴蕭蕭馬飲月窟水長城萬里遙征
人行從軍離家今樂春春花復秋草閨人念遠道遠道
歸無期漂流不相知徘徊復展轉展轉長相思相思不
相見涕淚鉛華滋風從西北來吹我井上桐寒涼颯將
至惻惻傷我衷乘月搗寒衣丁丁砧杵悲衣成欲寄遠
君在天一涯瘦馬戀破櫪倦禽思故巢君行亦已久孤
妾寧自聊遠使來長城帶得音信還書中何所道但道
寄平安平安不顧返歲月忽已晚君心知若何妾意今

無限

行路難

君不見翟公昔時作廷尉
蟬聯賓客填門至
竝披縫掖曳長裙
夕振鳴珂晝停騎
峨冠博帶稱徃古
吐氣揚眉論當世
交態渾如金石堅
朋情肯數芝蘭契
當時意氣何英雄
炙手可熱嘘生風
日晏聯鑣登紫閣
平明騎馬出銅龍
只道浮華長若此
誰云生死不相從
一朝官罷成索寞
門外庭前可羅雀
寂寂蓬居向午開
蕭蕭木葉

驚秋落古來此道今可悲須知榮悴亦無時花前且盡
一壺酒世事悠悠儂不知

行路難

龍門西接崑崙立中有一帶黃河流風雷噴薄不可以
利涉鬼浪吐雪龍為愁我行欲濟無方舟長吟澤畔成
久留暮天搖落對羈客白石楚楚青楓秋行路難歲將
夕靈槎八月秋風生安得乘之泝空碧

白頭吟

妾昔深閨裏風情未嘗識獨有如花容嬋娟自憐惜願
言嫁得同心人共駕雙飛彩鸞翼君時走馬從東來揚
眉吐氣萬人開當時鴻鴈豈無侶妾獨憐君英俊才一
夕誤踰垣從君共君語君指松柏枝歲寒永相許從君
衣錦還故鄉蓬屋蕭然但環堵相守在貧賤棲棲還共
居自除花靨面起結青羅襦當壚滌器不知恥遲君他
日乘高車一朝意氣題橋柱偶上金門見明主十年詞
賦髮成絲縱博黃金只如許才華備供奉富貴能幾何

文園病消渴憔悴亦已多金莖瑞露不得賜起視雲漢
空星河不謂羈旅餘向來聘私室舊好如塵埃新情若
膠漆清晨起坐白頭吟哀怨凌天薄雲日哀怨復哀怨
蛾眉空自顰生來見事晚怨妾不怨君投珠擲璧不自
惜晚節末路當何云妾已無復言於君更何道願君與
新人歡愛永相保莫貪春日兔絲花亦作秋霜女蘿草
妾有青銅鏡蛟螭蟠玉臺自君一為別棄置生浮埃志
殊心異不在貌珠簾繡匣寧勞開案上龍唇琴水絃冷

將絕悲來試一彈不覺淚成血因君一曲鳳求凰誤妾
淒涼百年月浪盪指明月清光無定時君心亦如此中
路豈不移妾心懷冰霜凜凜君詎知君心儻有能回日
缺月重圓應可期

昭君歎

憶初少小入宮時風鬟霧鬢綠菱鞋自言佳色已無匹
不謂官家猶未知十二瓊樓動光彩三千彩女妬蛾眉
鴛幃不作春宵夢紅葉常題秋日詩畫工不識媯妍趣

卻遣丹青故相悞，買工不是吝黃金。黃金已盡相如賦，
早知容貌世稀有。臨別夫君猶可顧，翻將寂寞倚門悲。
啼向迢迢去鄉路，穹廬雪落似梨花。五月天山草未芽，
鏡玉塵昏孤鳳影。臂紅香冷守宮砂，長門無復沾恩澤。
絕域誰知有歲華，不恨邊沙埋絕色。還聞漢國選良家，
人言北狩封姑衍。盡日凝粧候金輦，憔悴雖緣別恨添。
娉婷尚勝良家選，五雲迢迢山宛宛。日近長安一何遠，
新愛雖濃獨自憐。舊恩未斷誰能遣，琵琶一曲苦從軍。

調苦單于醉不聞霜壓氍毹秋欲半月低絃索夜將分
溶溶淚濕龍香撥冉冉愁看鴈塞雲病裏常思霍去病
夢中猶詛奉春君

湘妃曲

沅江木葉下洞庭秋水多湘靈美清夜隱約倚層阿冰
雪耀玉容遠山斂翠娥風鬟散香霧美盼溢回波明璫
結珠珮鮫綃夾素羅金支色璀璨翠蕤光盪摩小環奏
玉簫雙成鼓雲和瑤管雜哀怨清彈間嘯歌妙曲隨風

揚餘音泛流霞林端舞鸞鵠水際起蛟鼉問汝何所思
慨嘆慕重華軒車去杳邈黃陵起嵯峨汀洲生薜蘿
松栢掛女蘿清涕下灑竹爛斑隱成花日暮天氣肅星移
歲蹉跎靈荃不可見婉孌悲如何九原儻可作千載復
來過

阿嬌怨

妾昔初入昭陽時橫雲學得內家眉風鬟霧鬢在君側
長恃娉婷不自持侍宴前樓春爛漫承歡別殿夜逶迤

西涼絃索龍香撥北苑葡萄金屈卮一從寵薄恩光歇
長門永巷喧呼絕斗帳香銷荳蔻垂舞裙寬褪丁香結
熏籠夕倚瑣窓雨羅襪秋凌玉堦月淒迷夢醒心似灰
零亂憂來涕如雪橫塘浦口大堤邊女伴年年憶採蓮
雙飛翡翠渾如畫竝蒂芙蓉只似仙傍舍誰唵白華曲
下堂長詠綠衣篇君恩若許重相惜缺月清光應再圓

班姬怨

燕燕復燕燕飛來尾涎涎朝辭烏衣國暮入昭陽殿羽

毛一何好似許令儂羨遂令同輦人咫尺不相見新愛
易舊歡物情有遷變白日尚移光君恩詎能徧懷今思
獨永感昔淚如綫秋草沿玉堦流塵滿紈扇紈扇知妾
心攜持自障面時來即所遇勢失貴亦賤庭樹秋風生
無勞篋中怨

烏孫公主歌

咽咽復咽咽羊車鳳輦恩光絕新新復新新駝裘貂帽
來相親昔為花月漢宮女今作風沙北地人漢宮北地

何分別人生過眼如一瞥彩雲易消月長缺奈可嬋娟
涕如雪且喜從今罷戰爭天南天北樂昇平一堆紅粉
壠頭堊百萬兒郎邊上生漢宮剩有三千女豈憚邊庭
有北部從此龍泉不用磨只從天下選嬌娥銀鞍白馬
金索駝琵琶絃索聲相和葡萄酒綠朱顏醜壻家兒孫
日日多年年只報烽火息莫問嬋娟傷綺羅

白紵四時詞

四首

姑蘇臺上春風和江花亂落江水波交疏楊柳綠參差

華筵夜列開綺羅當筵西施間羣娥朱顏為君起微醺
自拈紅牙節清歌飛花著人思餘多華月耿耿度斜河
踈星出河夜欲過烏啼啞啞柰爾何

閭門輦路薰風時江光瀲灩芙蓉披翠羽霓旌照洲渚
鑿輿出遊初避暑西施含顰嬌不語羣娥鬪起歌白紵
回風舞袖為君舉歌聲窈窕一何長白紵之白白如霜
木瓜花紅荔子香東江月出西江光銀壺酒多樂未央
館娃宮畔風蕭蕭芙蓉隕香楊柳凋銀河影淡烏鵲橋

熒熒雙星麗碧霄美人微醉臉紅潮
筵前舉袖催玉簫
舉歌白紵鬪嬌姣越羅楚練風飄飄
此時奉君情欲絕
銅龍夜深宮水咽銀床低轉梧桐月

北風吹江日宛宛江天飛雪簾櫳滿
美人臺上鬪腰肢
羽觴流霞照華瑄筵前西施含醉眼
歌停綠水聲欲緩
羣娥玉環低款款別宿臺前水仙館
芙蓉帳高錦雲暖
儂覺寒宵作那短

團扇詩

團扇復團扇秋風浙浙昭陽殿燕燕飛來尾涎涎同輦
君王不相見長信宮深秋夜長玉階坐對明月光玉繩
低垂夜未央牽牛織女度河梁自投長袂數愆殃夢魂
彷彿若有亡君顏夢見在我旁覺來邈若天一方起援
鳴箏發清商舊怨未平新怨長新怨未平復舊怨怨此
銜泥梁上燕雙飛雙宿令人羨還來啄人嘴如箭燕燕
于飛奈爾何閒愁不為傷綺羅長陵百尺高嵯峨山精
日落悲薜蘿誰能為譜螽斯羽翻作當筵白紵歌

梁父吟

江水何深深青楓映雲林衡門一杯酒抱膝梁父吟君
不見夷吾奮袂投南冠故人薦引登君門揚眉吐論下
荆楚糾合冠裳朝至尊又不見樂生徒步從西來燕平
一擁帚調笑黃金臺轅門一日見旌節七十齊城生暮
埃古來英俊人所遇皆有立袖拂驪龍珠能令鬼神泣
而我獨何為幽泉凍蛟蟄荒蘿繞屋秋雨涼山鬼吹燈
冷光濕幾欲乘風朝太清芙蓉縹緲白玉京天田角井

散烟霧阿香布鼓琅璫鳴星辰可望不可即手把琅玕
空復情為臣自古良獨難我更懷之摧肺肝田疆古治
三猛士昔者虎視青齊間悞罹相國二桃計恨血今為
春草斑白頭勳舊且如此何況新知而覲顏梁父吟聲
正苦日落未落天星黃西園灌木秋楚楚青青千里草
如霧兀兀當塗高踞虎長陵百尺空嵯峨夜半山精泣
風雨世無女媧五色石天柱欲倩誰人補荊州水碧岷
峨青思美王孫渺何許梁父吟聲苦傷歌闌玉壺缺白

髮千丈長起坐擊長劍仰天悲流光西歸白日為誰晚
東流之水何泱泱青冥黃鵠儻垂翅我亦凌風隨爾翔

挂劍臺

我有白虹青霜之寶劍舞時朶朶蓮花艷去年北上東
蒙峰君眼如猫者不厭今年匹馬歸江東將期豁我抑
鬱磊落之心胸懷君不見淚如水墳樹索索生秋風歲
華零落對杯酒酒酣脫劍為君壽今為君贈君不知墳
前掛向桂樹枝等死酬知心所許劍有神靈劍應語金

環魚腸寧足數草平翁仲月荒涼山鬼提攜學吾舞

銅雀臺

阿瞞在時起臺殿宰割山河幾征戰賦詩橫禦氣何雄
賣履分香淚如霰良辰吉日人自悲安有繁華非昔時
華容嬌舞對松柏歌笑喧喧知為誰有歌有舞還尚好
莫怨西風翠蛾老君不見栢梁廢榭無人登烟草淒淒
茂陵道

楊白花

楊白花花離離隨風落萍草蕩漾無還期
仙桃醉日艷
鮓暖荔枝漿凍黃金盃連臂歌殘翠華館
愁來玉環低
款款春宵長春宵短

休洗紅

休洗紅洗紅顏色落莫思君思君懷抱惡
君恩原不淺
妾命由來薄君如白日不回光妾有芳情
向誰托
休洗紅洗紅生寂寞

蔣陵兒

蔣陵健兒身手捷青年好遊仍好俠錦衣繡帽綵絲囊
綠鬢蔥龍映朱頰春風二月蔣陵西柳暗秦淮花滿堤
騷裊金鞍搖日出輕盈紫陌踏花嘶佳人紈扇和詩贈
上客金瓶帶酒攜上客留連正及時佳人妙舞鬪腰肢
舞回璧月當空見歌罷楊花似雪飛楊花似雪紛紛落
酣醉人前誇浪語自然不分揖金張況肯低頭拜衛霍
意氣由來凌七貴豪華豈必資三畧五侯宅裏聽啼鶯
廷尉門前彈羅雀揚雄寂寞掩柴扉草得玄成鬢若絲

歲歲年年書閣底惟應羨殺蔣陵兒

苦寒行

隆冬十二月四野雲氣浮寒日霾夕光層陰肅幽幽苦
哉離家人歲晏尚遠遊北上太行坂詰屈阻且脩西轅
指張翼東轍望幽州巖風裂短袂密雪凋敝裘熊羆啼
路隅鬼火照林陬車轂陷泥滓馬毛凍飈飈涉險終日
行薄暮不得休苦顏帶冰屑涕淚沿眶流空山絕人烟
野飯依古丘行囊已罄盡何以慰旅愁苦哉離家人坐

念生百憂

鞠歌行

熒熒圃中花濯濯堤上柳春日齊敷榮秋至就衰朽萬
物隨變化浮生詎永久自非彭與聃誰能長壽考君看
少壯顏倏忽成老醜及時當黽勉遲暮復何有

傷哉行

長夜何漫漫愁氣悽已悲浮雲掩明月涼風吹我衣曳
履出房帷鳴珮下重階俯觀霜露集仰視星宿稀倦鳥

止復翔百蟲鳴聲哀飛翻念儔侶呻吟知歲時感茲時
物變惻怛傷我懷誰能駐流光息此心所思

懊惱曲

妾家良人壻執戟明光裏四時遷顯官寵幸無與比似
妾初嫁時容光照鄰里芳榮有衰歇喧赫詎可恃火熱
變灰寒懊惱何時已

長安篇

長安形勝地京華富才雄北開左馮翊南列右扶風漢

道方全盛象魏何穹窿
逶迤長樂坂壯麗未央宮
游俠多少年妖女秀華容
凌雲飛甲第照日輝簾櫳
行樂正及時綺羅繡龍葱
珠葉搖蟬鬢銀鞍被玉驄
千花色炫爛萬柳景昭融
擊鞠都門外鬪雞馳道東
青樓啓夕月瑤箏沸春宮
良時逝不留流連會有終
且極娛心意無為虛光風

上京行

京華全盛日江南鉅麗時
鳳閣凌天翥雕甍向日披
堤

楊垂宛轉溝水遠遙迤萬國年方泰三陽景載熙少年
縱娛遊游俠相追隨載酒聯絲絡乘驄鞚玉羈鬪雞初
賭錦擊鞠復爭馳百卉照眼明步障隨風移珍禽哢幽
響咬啞一何悲日暮宴青樓稱觴侑瓊姬開筵列上客
急管聞哀絲為樂殊未央但惜白日敬英雄極志意黃
髮以為期

採蓮曲

江南好採蓮蓮葉何田田魚戲蓮葉下鷗飛蓮葉邊蓮

葉蓮花耀洲渚桂楫蘭橈下長浦採蓮採葉忘採花隔
水停船共君語君語不還顧妾心將奈何回船向明月
月照江水波江水照妾影明月知妾情郎心得似此明
月兼照蓮花與蓮葉

短歌行

擊長劍和短歌短歌聲無歡調促情苦多盼流光疾逝
波青銅霜飛奈老何

長歌行

彈鳴絃發清商悲吹激林木歌聲一何長歌聲長絃聲
緩百年鼎鼎不易滿

古意 二首

山樊花落春風起吹妾芳情渡湘水夢中蝴蝶相交飛
門前鵲聲郎馬歸

梧桐初落金井牀斷蛩聲裏月如霜沉沉玉漏清秋夜
妾顏如花恐愁謝

秋風詞

三首
并序

魏文帝作燕歌行蓋秋風四時之變而其音韻鏗鏘情
思悽愴為千古七言之祖其後如少陵秋風兩首邢君
寶秋風三疊皆本此而作者也今特衍其詞語分為三
首略竊三疊之意雖未能以配詩祖則亦可彷彿四愁
之遺響云

秋風嫋嫋天意晶寒蟲唧唧霜露零白雲孤飛雁
南征念君歲闌遠遊行長年驅馳竟何成閨閣盼
望空熒熒哀來傷秋百感生感極涕淚沾衣纓何

人月高彈鳴箏絲絃急絲攪離情銀河橫天湛空
明哀猿寥寥共悽清微禽安棲夜不驚夫君胡為
未遑寧

秋風颯颯林木空吳山楚山千萬重湛湛江水上有楓
念君遊行遠從戎不遑寧居走西東寂寞空闈敞房櫳
獨宿涕淚沾襟胸悵望不見憂怔忡長雲遇天叫孤鴻
哀音嗷嗷思無窮黃姑斜河夜正中牽牛七襄淡橫從
夫君胡為苦匆匆

秋風浙浙庭宇虛日行南陸露如珠江空木落芳歲徂
念君遠遊今何如別離不得尺素書妾久悲傷惜居諸
惻惻涕淚盈衣裾凝思關山倚踟躇南鄰誰家吹笙竽
清聲撩人思煩紆絲星麗天明月孤城頭夜棲白頭烏
夫君胡為未寧居

南浦曲

君家住南浦妾家住橫塘少小曾相識况復是同鄉妾
年與君相上下月下花前幾相許相憐相愛君不知卻

共何人隔花語芙蓉被霜那得連荷風蕩露那得圓君
情君意苦難定妾貌妾心長自憐

橫塘曲

鶯黃不染衣蝶粉不勻面有情翻作無情悲相見渾如
不相見落花深處紫駟嘶紅藕香中畫舫移藕絲難疊
同心結花影空成連理枝君如宿沙鴻妾似浮波鴈暫
時照影相和鳴逐浪隨風各分散分散杳然去幾時還
合并芙蓉易謝月常缺亦似人間離別情

春愁曲

妾意一何長春光一何短良人遊冶郎去去不知遠含
桃石竹花盡紅房櫳蝴蝶醉春風令人翻愛遠離別孤
絕相思情更濃

春開曲

去年百花開春風妾顏窈窕如花紅今年花色仍自好
妾顏比花已漸老良人新愛移平生妾貌如花空復情
花開無言妾不語妾淚長垂花帶雨

游絲曲

游絲映戶春風盪雕簷雨浥蜘蛛網春花亦笑綺帳空
故遣飛紅入虛幌青樓夫婿醉忘歸魂夢相尋意轉迷
恍似妾心懷舊愛還如君意戀新棲綺疏鸚鵡通人語
戲把琵琶擲金羽含情暗卜無心負今夜渠儂到家否
游絲冒花風葉葉吳羅袷薄新寒怯蜂遊亦解鑽綺疏
不獨房櫳出蝴蝶懷人不為青春過別有閒愁幽思多
君情妾意俱腸斷舊愛新憐奈爾何

落花曲

昨日見花開今日見花落
花落花開還滿枝人老終無
年少時勸君及時且行樂
莫管花開與花落

木葉曲

南風木葉青北風木葉黃
木葉有零落客心與爾同悲
傷悲傷日日人漸老
明年木葉依舊好

蓮花曲

蓮花復蓮花蓮花相交加
葉如雲鬢偏宜綠花比妾容

還更佳蓮葉蓮花相對好
妾容妾鬢愁中老

葵花曲

蜀葵花開開復落黃金滿地
秋風惡良人遠去不歸家
秋風吹落蜀葵花蜀葵花落開復好
良人不歸愁欲老

鴛鴦篇

南浦雙鴛鴦生來不獨宿
葉底已雙飛花邊還對浴
鴛鴦可羨復可憐
況妾容華方少年

織婦詞

吳中白紵白如霜春風入衣蘭麝香二月城南桑葉綠
新蠶初出微於粟採桑日晏攜筐歸夜半懸燈待蠶熟
繰成素絲經上機兩日一匹猶苦遲織成裁衣與郎著
妾寧辛苦教郎樂家中貧富誰得知郎無衣著他人嗤

古鏡詞

貧女池邊得銅鏡鄰媪歡呼喜相慶持歸鉛粉三日磨
龍影模糊面猶瑩機中剪素為鏡囊染絲繡作雙鴛鴦
橫看豎照心不厭借插金釵學士堂廢銅雖舊惜於寶

無錢買新舊亦好誰識青樓金鏡開珍珠綴匣瓊為臺

漁父詞

順流得魚易逆流得魚難難易有天定順流心所安網
羅疎疎釣曲直老翁取魚兼取適

樵父詞

清晨腰斧出日暮腰斧入青青遍原野造化若不息我
願嚴霜殺荆棘蒼松翠栢高千尺

田家歎

田家養牛如養龍，妻孥望歲長防冬。耕田得暇縛屋茅，
編竹著泥防壯風。山田不雨水欲涸，田頭水車鳴角角。
歸來夜半猶未眠，新婦懸燈照蠶箔。田家作苦無休時，
夏來糶穀春賣絲。無因昨夜到城郭，羨殺狂遊輕薄兒。
朝耕山下田，暮耕山下田。辛苦食筋力，持此終歲年。耕
田得穀，豈不樂。但願年豐莫作惡。

耕父詞

牧牛詞

朝出牛亦出暮歸牛亦歸牧牛如種樹貴在不擾之放
牛散食山下草草香水甜牛易飽

牧羊詞

隴羊尾蓑蓑山虎毛離離願得山虎死隴羊長自肥蒼
茫大化良亦苦怪底生羊復生虎

射雉詞

春雉巢草中子母不相離時時引子嬉翅短還墮池回
弓落箭不射之深山大澤從汝飛

射虎詞

射羊得羊食射虎被虎傷始知學射虎不如學射羊村
前村後腰我弩但願逢羊莫逢虎

採菱曲

朝遊大堤口暮泛橫塘邊紅粉照綠水自羨還自憐紅
粧照水人見好涉江採菱何可道

石榴詞

纍垂纍垂復纍垂纍垂壓倒珊瑚枝西風擘破玳瑁皮

露出數顆珍珠兒

採蓮詞


誰家遊冶郎日日在橫塘只採蓮葉綠不採蓮花香採
蓮採葉猶自可憐新棄舊愁殺我

蠶婦詞

朝看箔上蠶暮取繭上絲絲成給日食不得身上衣早
知阿家蠶事若不若當初學歌舞

貧女嘆

寒花難為紅貧女難為容蕭條鏡中影寂寞林下風蛾
眉翠黛誰家女日日東鄰教歌舞



西菴集卷二

欽定四庫全書

集部
西菴集卷三
四

詳校官庶吉士臣龍廷槐

中書臣劉源溥覆勘

總校官庶吉士臣何思鈞

校對官中書臣王鍾泰

謄錄監生臣蕭椅年

欽定四庫全書

西菴集卷三

明 孫賁 撰

歌行

南園歌贈王給事彥舉

昔在越江曲南園抗風軒羣英結詩社盡是琪琳仙南
園二月千花明當門綠柳啼春鶯羣英組絡照江水與
余共結滄洲盟滄洲之盟誰最雄王郎獨有謫仙風狂

歌放浪玉壺缺劇飲淋漓宮錦紅青山日落情未已王
郎拂袖花前起歡呼小玉彈鳴箏醉倚庭梧按宮徵哀
絃泠泠樂未終忽有華月出天東裁詩復作夜遊曲銀
燭飛光白似虹當時意氣凌寰宇湖海詩聲萬人許酒
徒散落黃金空獨卧茅簷夜深雨分飛幾載遠離羣歸
來城市還相親閒來重訪舊遊處蒼烟萬頃波粼粼波
粼粼今日將夕西風一葉凌虛舟猶可題詩寄青壁

廣州歌

嶺南富庶天下聞四時風氣長如春
長城百雉白雲裏
城下一帶春江水少年行樂隨處佳
城南南畔更繁華
朱樓十里映楊柳簾櫳上下開
戶牖閩姬越女顏如花
蠻歌野曲聲咿啞
竒峨大舶映雲日賈客千家萬家室
春風列屋艷神仙
夜月滿江聞管絃
良辰吉日天氣好
翡翠明珠照烟島
亂鳴鼉鼓競龍舟
爭覩金釵鬪百草
遊冶留連望所歸
千門燈火爛相輝
遊人過處錦成陣
公子醉時花滿堤
扶留葉青蜺灰
白盤釘檳榔邀上客

丹荔枇杷火齊山素馨茉莉天香國別來風物不堪論
寥落秋花對酒樽回首舊遊歌舞地西風斜日淡黃昏

草書歌贈顏景明隱

鍾王去我忽千歲字體變怪少復真蟲文鳥跡久不見
塵姿俗態空紛紛邇來繼者誰獨步前有禿張後醉素
詞林秘府頃見之令我嘖嘖生遠慕君家此本猶清妍
神奇老筆真可傳頽牆敗壁霹靂死枯檜古栢蛟龍纏
秋蛇春蚓未易得見爾為爾重嗟惜寶之不翅珪與璧

煩君收取謹護藏莫遣風雷化真迹

羅浮歌寄洛陽李長史仲修

亭亭西樵峰宛在南海湄日華麗仙掌影漾金銀池我
昔扁舟恣長往凌風浩蕩烟霞想尋幽更欲探神奇復
向羅浮事仙賞仙家三十六洞天羅浮竄與滄洲連丹
霞射影四山靜羣真環珮來翩翩藥珠之峰數千丈君
時與我緣蘿上水簾直下飛晴虹萬壑天風度流響山
中劉郎司玉臺仙書授我琅函開心如明月炯虛照身

與浮雲同去來此時會合那能再塵土分飛忽三載我
行奏賦登金門君亦乘輶渡淮海淮海迢迢烟樹深相
思歲晚結愁心長風萬里碧雲遠何由一寄還山吟山
中洞房春寂寂山中之人長嘆息松花酒熟人不歸瑤
草春風幾回碧

智空和尚種松歌

老僧種松如種柳封植不知年歲久寒梢未解蟠穹蒼
已見鬱律蛟龍走焚香展席坐松陰白石清泉清道心

虛無自有神鬼會風雨不妨猿鶴吟老僧與松有深契
浮華淨盡存實際歲寒不受冰霜欺靜隱山中閱人世
亭亭只作如是觀松年僧臘俱高寒夜深滕六雪中立
日落山精林際看老僧愛松如骨肉不比枯梅與瘦竹
君不見人間艷陽枝春盡飛花滿岩谷

題皇甫文遠所藏左司郎中堵炳山水歌

繁華亂翠時共喜金膏空青人罕識每觀皇甫先生圖
令我感此三歎息墨樵避俗如避鴉折花頻見先生招

亂雲團成樹宛宛澹墨掃作山迢迢人言此是雲谷底
武夷下映九曲水不然五老匡廬峰萬疊芙蓉照彭蠡
低低茅屋溪澗濱墨樵更寫先生真千章古木一藜杖
毛骨自是仙中人塵緣淨盡丹砂熟蒼虬停飛虎亦伏
山童卷取琅函經縱有黃庭不須讀烟霞此樂真不迂
臨風却作長嗟吁十年未得還初服蕙帳石室今何如
先生歸來早卜築我亦同棲此山曲便煩作賦邀墨樵
更與泉南數竿竹

南京行

南京自古說豪雄
遠勝秦中與洛中
吳越千山高拱北
巴江一道遠朝東
秦淮水入丹陽郭
北固城連六代宮
岌業石頭如踞虎
逶迤鍾岳似盤龍
樓鳳閣天中起
萬戶千門霄漢裏
太乙勾陳紫極通
翔鸞舞鶴珠峰峙
卻日觚稜駕寥廓
行空複道侵箕尾
仙掌銅盤玉作漿
靈芝華蓋霞為綺
華蓋靈芝祭綺霞
御橋金水正當衙
五門彩旭朝天仗
馳道香風散日華
細柳千章爭拂地

嬌鶯百轉競啼花紫電龍光飛武庫雕甍甲第列侯家
侯家卿相真才彥玉笋蟬聯奉天殿屈宋摛文入石渠
韓黥耀武專方面黃閣承恩宣雨露烏臺執法行霜霰
環珮聲清散早朝葡萄酒綠沾春宴春宴春風坐百花
歸來里巷鬪香車金張富貴人爭羨王謝風流世共誇
隱約商笳隨赤羽葳蕤大纛映彤牙盤陀寶校光前導
組絡鳴鑣隘狹斜狹斜西下通三市紫霧紅塵拂天起
南陌東廂馬似龍烏衣朱雀人如蟻爭看買珠輕薄兒

亦訝探丸游俠子猶懷鳳臺醉李白無復新亭泣周顛
井傍美人悲麗華道上行人談結綺結綺臨春總可憐
龍河一帶但寒烟天界叢林開象魏冶亭高閣艷神仙
神仙盡是蓬瀛侶更畫秦臺玉簫女渺渺青鸞月下來
飄飄彩鳳雲中舉別有青樓大道旁烟花萬樹儼成行
飛瓊裊裊翠羅袖小玉娥娥紅粉粧小玉飛瓊兩少年
清歌妙舞鬪媽妍舞態盤迴芳樹底歌喉宛轉落花前
彩雲作雨朝朝合璧月流光夜夜圓朝朝暮暮長如此

秋月春花若流水去歲今年景不殊南來北去人相似
生綠羅屏遮上客流蘇帳暖邀公子爛漫三春錦繡城
空濛一片笙歌市繡華佳麗樂無邊我獨胡為困一廛
已似揚雄棲白屋還如司馬卧文園誰將積業三千牘
換取揚州十萬纏桃李風前歌扇底看花騎馬過年年

虹縣行

虹亭村落如秋花十里五里方一家山城縣治開草屋
草屋低窄旋桑麻丁男當官應徭役婦女看家種山麥

汴溝淤塞無稻苗麥足家家黍為食野桑養蠶收繭絲
棗根染絲來作衣秋湖水落蓮芡盛臘月雪深鶉兔肥
歲時澆酒五月暮但願開雲雨如注蠶成麥熟官事閒
柳堤人唱桑陰樹

平原行

古原縣郭如荒村家家草屋荆條門自罹喪亂新復業
千家今有一家存稚子採薪割蒿草婦女攜筐拾梨棗
丁男應役不在家長駕牛車走東道黃河水涸無魚蝦

居人七月方食瓜人烟星散不成集棠梨苦葉烹為茶
凌州九月官稅促黍子在田猶未熟春霜夏旱蠶事空
不賣新絲賣黃犢銀河七夕如水流明年麥好君莫愁

平原田家行

零星矮屋茆數把散住榆林柳林下磊牆遮雪防驟風
婦女頽垣拾磚瓦黃牛買得新墾田土戟犁淺牛欲眠
古河無水掛龍骨自縈蒲繩探苦泉山蠶食葉黃繭老
野火燒桑桑樹倒四畔靈雞喔喔啼九月霜風落紅棗

春絲夏絹輸稅錢木綿紡布寒暑穿夜舂黃米為新酒
學唱清商作管絃平田旱多麥少熟杏盡梨枯惟食粟
衣粗食惡莫用悲猶勝北軍離亂時

驪山老妓行補唐天寶遺事戲效白樂天作

秋風楊柳凋金縷冷露芙蓉落芳渚寒香晚色何所如
驪山唐姬教坊女蛾眉淡掃山遠碧蟬鬢半拋雲亂吐
時粧無復新妖嬈曩態猶存舊嬌嫵我昨咸陽縱冶遊
冶遊爛漫遍西州青山直抵雙龍闕綠水橫過五鳳樓

南國佳人金錯落長安公子玉驂騮銀壺送酒青絲絡
皓齒當筵白雪謳琵琶橫笛空聒耳唐姬搗箏妙無比
清彈一曲久含羞呼喚百迴纔強起移柱相參鴈成列
調絃未就人先喜俛首斜拖珠步搖向人高露春纖指
樓高韻發響泠泠急管悲歌一霎停初聽乍如風雨至
再彈還作鳳凰鳴清如玉女鈞天奏壯似雕戈出塞聲
澗水帶冰時哽咽春雷震石忽憑陵憑陵未已旋清悄
清悄漸凝聲漸小四座無言俱寂寥餘音已斷猶縈繞

溶溶宛宛復悠悠切切淒淒還窈窕深閨斷蚓怨寒宵
淺谷嬌鶯破春曉纏綿萬恨與千愁婉意柔情不肯休
蔡琰胡笳悲紫塞班姬團扇掩清秋樓前皓月明如練
天外行雲凝不流促拍未終南內曲新腔忽過小梁州
梁州一摺月向午唐姬此時心獨苦銀甲悲深不忍彈
衷腸斷盡無由語低籠翠袖搵香泪翻使歡娛變淒楚
訴盡平生富與貴可憐人世今成古憶昔開元正太平
兒家生長在天京十三學舞曾驚座十四搗箏能擅名

玉貌羞花長窈窕宮腰怯柳更輕盈春寒不離鴛鴦枕
日晏方開孔雀屏五陵年少秦川客爭愛兒家好顏色
殢雨尤雲最惱人追歡買笑寧論直聲名每出流輩上
風致獨覺旁人惜承恩況得登掖庭宛轉隨龍侍君側
海晏河清久息兵四夷賓貢盡充庭炎方已見來丹荔
交趾還聞進雪鸚耀日香車連紫陌飛雲畫棟列朱甍
空濛一片笙歌海浩蕩三春錦繡城驪山山上多樓閣
萬戶千門通碧落大駕深居在九重四時多暇惟行樂

已營連昌勝結綺復起芳鳳齊花萼壺飛玉女遞更籌
舟戲金龍動鱗角侍臣傳勅選嬌容特許兒家步輦從
宮扇影移花雨外山呼聲沸錦雲中千株火樹爭明月
萬炬金蓮鬪彩虹子夜歌詞翻白雪霓裳舞隊散旋風
歌停舞歇徘徊久銀箏獨進纖纖手明眸麗質一當前
含顰美人俱在後數聲清響動絃索八面涼風生戶牖
艷曲新裁萼綠華中官催賜葡萄酒年年秋月復春花
多在宮中少在家嬌笑不愁宮監怒艷粧長得阿姨誇

朝遊複道瞻天表，夜步西廂拜月牙。
鬪草經春陪甕國，藏闔竟夕伴昭華。
韶光忽逐流年轉，野鹿銜花上林苑。
鍊騎東來鳳闕空，金根西狩蛾眉遠。
上方無復聽宣召，新籍寧辭避差遣。
約臂金環雨雪寬，凌波錦襪風塵蹇。
星移物換得無情，復向驪山悄地行。
紫禁無人芳草合，瑤階雨過綠苔生。
歌臺索寞花千樹，舞榭蒼涼月半櫺。
繡閣秋陰連瑣闥，銅仙清淚落金莖。
高梧隕翠蓮飄玉，太乙勾陳看不足。
百子樓寒霧影昏，長生殿古烟光綠。

宮牆瓦落見蒿萊輦路塵生走麋鹿舞馬雕床惱夢思
花奴羯鼓驚心目故宅新人作宴遊內家紅錦列纏頭
珠簾繡柱俄成夢鳳管龍笙總是愁舊曲聞來眉自斂
盛年說著口應羞飛蓬短鬢難禁白老屋疎茅不奈秋
舞衫長借鄰人著同伴相呼只推却臉玉香隨翠靨消
淚珠暗逐燈花落憂來倒插黃金鳳夢裏時彈白翎雀
百感中來不自由芳心一片從誰托唐姬言語一何長
句句淒其字字傷滿座聞之聲唧唧沾巾我亦為浪浪

滄桑轉瞬誰能識富貴浮雲安可常覽鏡每聞悲素髮
舉杯長欲勸流光唐姬莫道懷抱惡自古佳人多命薄
傾城西子逐鴟夷絕代明妃嫁沙漠樽前有酒且懽笑
身外閒愁付冥漠皎月秋來幾度圓穠花春盡從渠落
唐姬攬涕復陳情請作驪山老妓行桃李風前霜月下
長吟亦足慰平生不因水上琵琶語那識江州司馬名
為爾臨風歌一曲百年哀怨起秦箏

余既作此詩本戲筆吟弄以為懽笑耳而客

有問余者曰子詩淺易明白彷彿樂天然用
事不免多誤上林苑是漢家事白翎雀是世
曲子百子花萼樓恐不在驪山上如何余笑
曰那知許事且啖蛤蜊西山朝來頗有爽氣
高昌老翁行

高昌老翁背隆然黃鬚高鼻毛髮拳自言少小家幽燕
生長適值錄華年出身從戎事西邊十七八九南營田
雕戈如雲護中堅流蘇帳暖垂蜿蜒三珠虎符誰喜懸

偏裨盡戴黃金蟬軍中無事惟游畋錦袍白馬青連錢
飢鷹一掣沖九天駕鵝洒血來連連夜闌愛月醉不眠
衆賓呼盧各爭先輸籌唱飲開錦筵美人照座紅娟娟
涼州葡萄斗十千金盤丹荔明珠圓野駝之酥香不膾
爭持寶刀誇割鮮忽爾不樂心悁悁琵琶催張鳳凰絃
織歌一曲清聲傳華嚴天魔間采蓮美人起舞鬪媽妍
腰肢宛轉飛花旋玉釵斜橫翠袖偏春風徐來拂筵前
此時意氣如熊虎伯仲聯翩享珪組青雲頭上高楚楚

却笑旁人不好武一朝零落來南土白髮蕭蕭守環堵
北風怒號朔雪舞羊裘無溫敝不補人間俯仰成今古
老翁無乃獨愁苦霸陵將軍舊征虜青門秦侯亦開府
浮榮飄風何足數

碌碌行寄保昌縣丞童豫

碌碌復碌碌驅馳半世為斗粟去年臘盡江左邊今春
又駕江南船家貧每畏別離苦不知攜累還顛連炎雲
四月關門道青泥滑滑雜流潦黃梅雨裏鉤輶啼瘦妻

前僵子後倒君時相見能相憐
自出床頭官俸錢東家
蹇驢覓借我使我枯槁回春妍
貧賤結交常草草多難
逢君識君好不得與君長周旋
關門長望令人老

湖州樂

湖州溪水穿城郭傍水人家起樓閣
春風垂柳綠軒窓
細雨飛花濕簾幙四月五月南風來
當門處處芰荷開
吳姬畫舫小於斛蕩槳出城沿月回
菰蒲浪深迷白紵
有時隔花聞笑語鯉魚風起燕飛斜
菱歌聲入鴛鴦渚

雲南樂

成都賈客向人語
黎州多風雜多雨雪
山萬古長不消
山下四時風氣暑
竹林西畔是雲南
不論冬夏披氊衫
蠻官見客花布襖
村婦背鹽青竹籃
繩橋跨澗石巖葉
部落馬蹄皆灌鐵
引繩貫索通客行
插木入崖防棧絕
邛筒酒熟蠻人歌
太平今喜無兵戈
懸車不戍相公嶺
賣馬安行大渡河
牛纓換貸躋邛笮
路出彭門緣劍閣
火井秋篁截洞簫
幾腔吹作雲南樂

西菴集卷三

欽定四庫全書

西菴集卷四

明 孫蕢 撰

七言古

閨中聞子規

交疏日射房櫳曉碧樹初聞子規鳥
驚回殘夢了無歡
慘切春愁破清悄獨宿何曾下繡幃
寧勞勸我不如歸
鶯花爛漫江南道好向遊人醉處啼

晚發英德

山城斗大臨江橫數椽茆屋炊烟青炎風吹林桂花落
斜日倒影滄江明滄浪萬頃舟如葉舟子齊橈歌激烈
一篙新水靜悠悠今日江頭雨初歇

贈端孝思

端郎白皙如冠玉葩辭麗藻撐滿腹生來未作九品官
聲價蚤已驚流俗阿翁舊日尚書郎出領方鎮專衡湘
掖垣休暇會賓客冠帶楚楚盈華堂憐君三十猶未娶

雲南樂

成都賈客向人語
黎州多風雜多雨雪
山萬古長不消
山下四時風氣暑
竹林西畔是雲南
不論冬夏披氈衫
蠻官見客花布襖
村婦背鹽青竹籃
繩橋跨澗石巖葉
部落馬蹄皆灌鐵
引繩貫索通客行
插木入崖防棧絕
邛筒酒熟蠻人歌
太平今喜無兵戈
懸車不戍相公嶺
賣馬安行大渡河
牛纓換貸躋邛笮
路出彭門綠劍閣
火井秋篁截洞簫
幾腔吹作雲南樂

西菴集卷三